

Regional News Unit AIR Aizawl
Tuesday, February 04, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Tun thla ni 12-a Village Council/Local Council inthlanna vote thlak hun tur atana inbuatsaihna chu ngawrh taka kalpui zui a ni.
- Political party hrang hrang ten khaw tinah campaign beihpui an thlak mek
- President Draupadi Murmu-in Parliament-a a thusawi chungchanga lawmthu sawina motion chu Lok Sabha leh Rajya Sabha-ahte sawiho tan a ni
- Sawrkar laipui chuan kum hmasa chhung khan ram chhung khan hna nei lo zat chu zaa 6 atangin zaa 3.2 in a tlahniam a ti..

<><><>

VC ELECTION PREPAREDNESS

Tun thla ni 12-a Village Council/Local Council inthlanna vote thlak hun tur atana inbuatsaihna chu ngawrh taka kalpui zui a ni a,

Nimin atang khan Mamit District chhunga Village Council Election-a duty tur ten Person on Election Duty (PED) hmangin vote an thlak tan a.

Election Duty avanga Polling Station a vote thlak thei lo turte tana vote thlak theih hun siam chu nimin kha niin, Person on Election Duty (PED) diltu te chuan nimin khan Facilitation Centre, DC Office Mamit-ah Vote an thlak tan a, Mamit District-a vote nei Security Duty tur te leh R.O. te tan ni 3 leh ni 4 chhung vote thlak theih hun hawn a ni dawn a, ni 5 leh ni 6 chu Polling Officials leh District danga vote nei Election Duty-a kal chhuak tur PED hmanga vote thlak diltu zawng zawng te tan vote thlak theih hun hawn a ni bawk ang.

Nimin vek khan khan Kolasib ah Village Council inthlan lo awm tur pualin Polling Officials-te tan Govt. Kolasib College-ah Training buatsaih a ni. Pi Doris Lalrinawmi, BDO Thingdawl, Pi Zorinsangi, SDC leh Pu Lalthanzuala, SDC-te chuan Training hi an pe a.

Lunglei District-ah pawh nimin khan District Election Officer Pi Navneet Mann hovin inthlan lo awm tur Inbuatsaihna kal mek thlir hona hun hman a ni. He hunah hian nodal officer-te chuan an hma lakna report pein, inbuatsaihna tuang taka kalpui a ni tih tar lan a ni a. A theih chin chinah ruahmanna siam fel niin, tuang takin inthlan buatsaih theih a nih beisei a ni.

<><><>

POLITICAL PARTY CAMPAIGN

Tunthla ni 12-a Village Council/Local Council inthlanna vote zawngin political party hrang hrang ten khaw tinah campaign beihpui an thlak mek a,

ZPM General headquarters Party Office chung inkhawm nimina neihah Home Minister Pu K Sapdanga chuan thusawiin, an hun laia thiltha an tih theih loh zawng zawng ti thei turin an beisei mai ni lovin Sorkarna an chelh laia an lo tih thin anga ti ve turin an duh lo a ni, a ti a, hetiang Eptu Party an nei hi vannei an in ti tak zet a ni, a ti.

Home Minister Pu K.Sapdanga chuan, Kuhva dan lo anga tawlh ruk vengin police te an thawk rim hle tih sawiin, tunah hian Police Duty te helna hi Kawngruk 29 a awm a heng kawngruk te hi Sorkar hmasa atanga an rochun ni a sawiin, kawng tam takah chuan tlawmngai pawlte leh VC ten Sorkar venpuia tlaivar a Duty te pawh an awm a ni, a ti. Pu K Sapdanga chuan Smuggling Kuhva tawlhru te thurualpuia lo tanpui zawk VC an awm tih an hriat thusawiin heng VC te avang hian VC inthlan hi an nghakhlal em em a, inthlan zawh lamah chuan Kuhva tawlhruk pawh hi a tlahniam sawtin an ring a ti a ni.

MNF Siaha District party office hawna nimina hmanpuitu MNF Senior Vice President Dr.R.Lalthangliana chuan thusawiin, India Constitution Sixth schedule hnuia sorkarte - Autonomous District Council chu en hniam emaw ngaihthah chi emaw a ni lo tih hriat thar a tul a ti a, State danga Autonomous Councils neiten an Council dinhmun an ngai pawimawh a, dinhmun sang takah an dah thin tih a mimal ang pawha a hmuhchhuah thar thu a sawi a ni.

Dr Lalthangliana chuan tun sorkar chu Zoram mipuia beisei tharna "Kalphung thar" intiam an ni a, an duhthusam apiang chu duang chhuakin mipuia an inzuar a, chu kalphung thar chu Zoram mipuiin an han lei ta a, mahse han belhchian chuan a seal pack chu *ISI mark chuang lo* a lo tam si a, mipuiin han kir leh dawn se, a man an lo pe leh laklawh si a, lungsi lo taka kawl an lo ngai ta a, mahse lei nawn leh chu an tum tawh lo tih sorkar hnathawk, neutral leh kohhran ho atangin a hriat a ni a ti. Tun sorkar kum khat leh thla hnih kal mek chuan state budget bak cheng khat mah pawh chhuah reng reng an neih an la hre lo a. Zoram mipui te zirtir nan chung lamin he sorkar hi a pe a ni tih pawm mai a tul a ti.

Nimin khan Kolasib Congress Block-I Committee buatsaihin Kolasib Venglai-a Taitesena Hall-ah political training neih a ni a, he hun hi MPCC President Pu Lal Thanzara'n a hmanpuiin Pu Lal Thanzara chuan ZPM sorkarin BJP an zawmna leh an thu intiam tawn ang an tih hlawhtlin loh avangin BJP sorkar in a hrek a ti a. Central dawrtu Chief Minister leh Minister te thil hawn chu thlalak thar an neih belh chauh hi a ni, a ti.

Pu Lal Thanzara chuan ZPM sorkar chu BJP duh anga an awm hma loh chuan engmah an ti thei dawn lova, BJP duh anga an awm hun hunah Kohhran rilru an hliam dawn avangin tunah hian tuilairapin a awm mek a ni, a ti.

Congress Party chuan mitin thleng phak ruahmanna NLUP changtlung zawk hmangin Mizoram dinhmun a siam tha leh dawn tih sawiin, eizawna harsatna leh sum vâng lutuk vanga mipuite tawrhna zawng zawng hi thawnthuah an chantir dawn a ni, a ti bawk.

BJP Mizoram State Office, Upper Republic a Karthar Inhlanna leh Political Session hun nimin khan BJP Mizoram State Vice President Pu Vanupa Zathang chuan thusawiin Mizoram Sorkar ngei chuan BJP-a inchhunluh mai duhna emaw thawhdunna tha tak neih an la duh hial maithei a ni, a ti a. Hei hi a chhan chu, state rethei tan chuan Central atanga sum lo kal tur a pawimawhin Central sawrkar thawhpui thiam a pawimawh em a, mahni kut ke ngawt chuan kal ngaihna a awm lo a ni a ti. Mizoramin hmasawna tha zawk a hmuh ngei theihna turin BJP chu Mizoram Sorkar hian lo thawhpui pawh ni se Mizoram mipuite hian an hrethiamin a rinawm a ni, a ti bawk.

Pu Vanupa chuan Mizoram ah BJP hmasawna an hmu mek tih sawiin, tunah Chakma Autonomous Dist Council ah pawh BJP kaihhruai Sorkar ah beiseina sang tak an neih avangin, Sorkarna siam a ni dawn a ni a ti.



AMVCA

All Mizoram Village Council Association (AMVCA) ten Village Council term pawh tawi anih vanga Mizoram Sorkar an khinna chu nimin High Court chuan a ngaihtuah zui a, court thutlukna hi tunkar chhunga puan hman beisei a ni.

AMVCA President Pu K Lalngaizuala hnen atanga Akashvani Correspondent thudawn danin Mizoram VC ding mekte term thla 6 chuang zeta pawh tawi anih vanga Mizoram Sorkar an khinna chu nimin khan Gauhati High Court, Aizawl Bench-ah sawi zawh fel a ni a. Court thutlukna chu reserved ah la dah rihin tunkar chuan thutlukna hi tih chhuah hman an beisei thu a sawi a, Court chuan an hma ngaia thutlukna a siam ngei an ring tih a sawi bawk a ni.



MBSE

Mizoram Board of School Education (MBSE) leh Performance Assessment, Review and Analysis of Knowledge for Holistic Development (PARAKH), NCERT tangkawpin ni 5 awn tur, Holistic Progress Card (HPC) leh Standardization of Question Paper Templates tih thupui hmangin Workshop an buatsaih a. Pi Sarah Lalengzami Pachuau, Secretary, MBSE chuan Workshop hawna hun hi kaihruaiin Pu David Lalthangluanga, Special Secretary, School Education Department chuan Workshop hi a hawng a ni.

Pu David Lalthantluanga chuan zirlaite hmasawna tehfung atan exam-a an mark hmuh piah lam ah an thil zirte a tak a an hman chhuah dan te, mi zing a an khawsak dan leh thil dangte huam tir tur a ruahmanna chuan zirlaite ah hmasawna dik tak a thlen ngei a beisei thu a sawi a. Holistic Progress Card, a tak a hlawhtling tak a hman a nih theih nan hemi kawng a mawhpurhna nei zawng zawngte inpekna leh tanrualna a pawimawh thu a sawi bawk a ni.

He hun ah hian Prof. Indrani Bhaduri, CEO, PRAKAH chuan kawng hrang hrang a zirlaite hmasawna dik tak hre tur chuan Holistic Progress Card hman a tul thu leh Board hrang hrangin zawhna harsat dan inchen (Standardized question paper) an buatsaih thin a pawimawh thu a sawi.

Ni 5 awn Workshop buatsaih chhung hian Holistic Progress Card zulzui a Assessment Rubrics duan dan te, State question paper zirchianna te, Assessment design and blueprint siam dan te leh Model question paper duan dan zirtirna neih a ni dawn a.

PARAKH, NCERT atang a mi thiam ten zirtirna hi an pe dawn a, Secondary, Higher Secondary School, IASE leh DIET atangin zirtirtu 50 chuang an tel a ni.

<><><>

RTI

Mizoram RTI Online mobile application chu update fel tawh a ni a, Playstore leh Appstore ah te download tura dah a ni.

Mizoram RTI Online mobile app hmang mek te tan a app hlui uninstall kher ngai lovin update mai tur a ni a, login credentials (email/mobile & password) hman lai mek chu hmang chhonzawm leh theih a ni. RTI zawhna, Appeal leh Complaint thehluh tawhte leh chhanna dawn tawh zawng zawngte pawh a bo loin application ah dahthat vek ala ni ang.

Mizoram Information Commission chuan RTI Online hi tangkai taka mipuiten hmang chhonzawm zel turin duhsakna a hlan nghal bawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

MOTION OF THANKS

Nimin atang khan President Draupadi Murmu-in Parliament-a a thusawi chungchanga lawmthu sawina motion chu Lok Sabha leh Rajya Sabha-ahte sawiho tan a ni a.

Rajya Sabha ah chuan BJP MP Krian Choudhry chuan sawrkarin loneitute sum lakluh a leta tipung tura hma alakna te a tarlang a. Opposition te chu sawrkar do zawngin thu belhchian dawl lo thehdarhah a puh a ni. Leader of Opposition leh Congress Leader Mallikarjun Kharge chuan ramchhunga hnane lo tam lutukte, thil man sang leh India rupee hlutna tlahniam chungchante a sawilang a. Sawrkarin a ngaihsak tawkhloh avangin ramchhunga loneitu tam takin an nunna an la a ti a. Sawrkar chu a intiam anga kumtina hna thar vaibelchhe 2 pe ziah tura a insawi chu a tihlawhtling lo tiin a puh a ni.

Lok Sabha-ah chuan BJP MP Ramvir Singh Bidhuri chuan Narendra Modi-a kaihhrui sawrkar chuan mipui nun chawikan nan scheme tha tak tak a kalpui te a tarlang a ni.

Hetihlai hian Leader of Opposition leh Congress MP Rahul Gandhi chuan President thusawi chu nikum ami nen a danglam lo a ti a. Hne vang lutuk avanga harsatna a la ngai reng tih sawiin sawrkar chuan tihngaihna a hre lo niin a sawi a. Sawrkar flagship programme Make in India chu ngaihtuahna tha tak ni mahse sawrkarin awmze nei takin a kalpui thei lo a ni a ti bawh.

<><><>

UNEMPLOYMENT

Sawrkar laipui chuan kum hmasa chhung khan ram chhung khan hna nei lo zat chu zaa 6 atangin zaa 3.2 in a tlahniam a ti. Lok sabha ziaka zawhna chhangin Union Minister of State for Labour and Employment, Shobha Karandlaje chuan Periodic Labour Force Survey hnukung berah khan kum 15 chunglam hna nei lo zat chu a tlahniam tih a sawi a. Sawrkar chuan scheme leh programme hrang hrang kalpuiin hei hian hna a siam pung a ti a.

<><><>

CEA

Syria hmarlama Manbji khawpui daifema car bomb puakah mi 19 an thi. Mitthi zinga mi 18 hi hmeichhia an ni a. Syria civil defence thuneitute chuan hmeichhe 15 in hliam an tuar tih sawiin thenkhat chu an hliam na hle niin an sawi a ni.

<><><>